



STARI GRAD JEZERSKI

Stari grad Jezerski nalazi se na oko četiri kilometra udaljenosti zapadno od Bosanske Otoke. Smješten je na dugačkoj kosi, koja se strmo obara u pitomu dolinu. Prvi put u historijskim izvorima spominje se 1278. godine. U građevinskom pogledu ovaj grad je vrlo interesantan kao predstavnik posebne vrste starih gradova, iz kojih su se kasnije razvile savršenije tvrđave. U sredini Jezerskog nalazila se visoka okrugla kula, čija debljina zidova iznosi 1,8 metara, a ulaz joj je uzdignut 4 metra iznad nivoa tla. Oko kule se uzdizdao čvrst i 7 metara visok zid u obliku četverokuta dužine 16 i širine 12 metara. Ovaj grad sazidan je prije pronalaska vatrenog oružja, što dokazuje okrugao oblik otvora u zidu, koji su služili za gađanje lukom i strijelom. Grad je u početku pripadao slobodnoj plemenskoj općini, a krajem XV stoljeća kao gospodari spominju se Nemčići. Godine 1563. grad je čuvala posada od 16 kraljevskih vojnika.

Pod osmansku vlast Jezerski je došao 1576. godine i uključen je u sastav Krupske kapetanije. Osmanske vlasti su pored starog grada izgradile drvenu džamiju i nekoliko zgradaq i sve to opasale novim bedemima. U grad je smještena vojna posada, kojom je zapovijedao dizdar potčinjen krupskom kapetanu. Ova posada se do polovine XVII stoljeća sastojala od 23 graničara, a onda je povećana na 30 graničara. U prvoj polovini XVIII stoljeća posada je udvostručena pa je brojala 60 ljudi, a tvrđava je pojačana s dva manja topa

